



05. december 2008

Inatsisartut Forretningsorden-iani § 36 imm. 1 tunngavigalugu Naalakkersuisunut apeqquteqaatit makkua apeqquteqaatiginiarpakka:

Naalakkersuisunut apeqquteqaatit:

1. Inatsisit atuuttussanngortinneqarsimasut atorneqalernerannut tunngatillugu inatsisit al-lat inatsisinut atuuttussanngortinneqartunut atatillugu attumassuteqartut naleqqussarneqarnerinut tunngatillugu, tassa atuuttussanngortinneqarnerinut atatillugu nakkutillinnissap pisariaqartinneqartussap ingerlanneqarnissaanut Naalakkersuisut sunik suliniuteqarpat?

2. Inunnik isumaginninnermi inatsimmi allaqqavoq innatsimmik malinninngikkaanni pin-erluttulernermi inatsit tunngavigalugu pineqaatissiisoqarsinnaasoq, inatsit taanna Naalakkersuisut qanoq paasivaat, qanorlu nassuiassavaat?

3. Inunnik isumaginninnermi inatsimmik eqqortumik malinnittoqannginnersoq nakkutigissallugu kinarpiaq akisussaava?

(Inatsisartunut ilaasortaq Palle Christiansen, Demokraatit)

Tunngavigisat:

Assersuummik saqqummiussaqaarlanga, kiisalu sooq apeequteqaammi 1-imi apeqquteqaateqar-nersunga imaattumik nassuiarlara:

Inatsisartut inunnik isumaginninnermut inatsimmik atuuttussanngortitsipput. Soorlo assersuutigalugu inatsimmi tassani allaqqavoq nunatsinni illut pisortanit pigineqartut tamanillu iserfigineqarsinnaasut inatsisit tunngavigalugit innarluutilinnit iserfigineqarsinnaasariaqartut kiisalu innarluutilinnut naleqquttunik atortulersugaassallutik. Tamatuma kingunerisaanik sanaartornermi maleruagassani ersseqqissumik allaqqasoqarnissaanik piumasaqartoqartariaqaraluarpoq, tamannalu Namminersornerullutik Oqartussat aammalu Kalaallit-nunaanni kommunit nutaanik sanaartugassanik sanaartulersigatik imaluunnit pioreersunik allanut atugassanngortitsinissat sioqqullugit tamatuminnga ilisimasaqareertariaqartut.

Apeqqut 2 aamma 3 apeqqutigaakka, tassa maanna inatsit malinneqanngippat tamatumunnga akisussaaffik inissinneqarsinnaasariaqalermat.

Naalakkersuisut qinnuvigineqassapput apeqquteqaatikka ullut suliffiususut qulit qaangiutsinagit akussuteqaqqullugit.